

玉鑑堂詩集

王鑑堂詩集卷五

烏程汪曰楨著

同邑後學劉承幹編次

題吟梅圖次韵

冷艷先春發妙姿詠花有客寄深思
魂清骨峭眞高士格麗詞新大好詩
白裕風前吹笛罷縞衣月下叩門時
鬢眉活脫傳神手絕似添毫顧愷之

巡簷我亦愛幽姿玉照亭亭若有思
隱几煙霞頻結夢閉門風雪嬾尋詩
孤高氣骨宜吾輩冷淡心情異昔時
偶對寒香醉明月濁醪聊復一中之

王硯農每歲蒔菊四百餘種去秋邀客宴賞賦詩
陶梅若爲作青來草堂菊譙圖予頃奉訪草堂

花開正盛酌酒持螯因作二詩卽題圖後

孤高氣骨本天真晚節幽芳結比鄰四壁名花宜隱士
一時好友總詩人澆泉抱瓮晨行汲翦燭開筵夜款賓
老圃從今添韵事石湖譜錄更翻新

笠蓑冒雨款門時劇喜雙螯左手持嗜酒不妨無事飲
愛花未免有情癡評量佳色秋三徑點綴幽居水一涯
思舊轉縈他日淚黃墟棖觸杜陵詩

令弟臺叔久返道
山梅若曾作客窗

哭友
圖

車行口占

衝寒千里度關山日日車輪馬足間回首漁鄉煙水闊
鞭絲爭及釣絲閒

苦爲微名不自由風餐露宿困煩憂如何款段居鄉里
西笑長安羨壯游

行路難山東道中渡河作

吁嗟乎行路難前荆後棘進退艱旅人辛苦徒長歎不
必卽嶮九折坂不必龍門千仞灘計偕我上京華去一
水無端阻前路就深必賴有方舟羈留坐使征車駐北
方水利功難成霖潦一降隨縱橫絕似文章大好手條
從平處波瀾生此河不及一里闊水聲湯湯何太急奔
流迅駛不復回墜溺懸知命難活輿夫解事催發程我
到河干天乍明誰知行人早羣集紛紛渡口方喧爭爭
先不肯排次序欲速翻遲良自誤沙頭久待無奈何斜

日將頽隱低樹蒼茫暮色纔登舟四車相竝魚駢頭船
舷偪仄立不穩兩手匍匐扶雙轡駕騾上車已昏黑逆
旅遙遙望不得輿夫俯首僕夫愁兀坐車中自憫默疲
驟雅步猶盤桓手中驅策空持竿載飢載渴那可忍夜
深曾未餐朝餐吁嗟乎行路難

西楚霸王墓

宰樹蕭蕭振朔風大王遺恨滿江東重瞳何意同虞帝
瘞骨無端視魯公壁上諸侯皆豎子帳中兒女亦英雄
吾徒太息儒冠誤書劍虛殫十載功

趙北口渡十二連橋

惘惘輪蹄劇苦辛偶逢清曠此溪濔燕南趙北平如礪

可有耕漁避世人

曾記西泠泛畫橈蘇隄風月屢招邀誰知驛路紅塵裏
又渡朱闌十二橋

垂楊新綠已毵毵水色天光鏡裏涵惜少遙山青一角
煙波十頃似江南

緩緩輕車細碾沙連村燈火見人家天公特遣征途滯
留我尋詩看晚霞

哭董鑄范 蠡舟 三首

江南弔鶴愴前塵廿載苔岑意倍親把卷作師兼作友
升堂誰主與誰賓笑談忽憶鬚眉古交際常留氣骨真
倘讀襄陽耆舊傳龐公或恐是前身

覃研考證琢詞章經史羅胸孰執行直筆評量新例穩
曲臺推闡古儀詳詩篇集擬東坡富畫本名齊北苑香
可惜金荃功未竟叢殘手稿溢青箱

春苑傷情雅句裁冬缸濡淚畫圖開自娛元亮花三徑
嬾把公榮酒一杯暇日讀書原是福餘年多病轉爲灾
平生知己晨星比長向人間賦八哀

夜讀紀石齋

磊詩

煮字從來不療飢頻年底事撚吟髭孤高氣骨羞諧俗
眞率文章嬾炫奇欲定去留難自主試尋甘苦問誰知
憐余深夜愁無寐敲火披衣更讀書

題戴梅簫

餘

蜀道陟岡圖二首

萍跡當年寄錦城。壩燒曲檻變哀聲。宦場落莫荒田宅。
家事艱危仗弟兄。境過幾如重說夢。心安原不爲求名。
力從鉤棘謀平帖。陟險探幽共此情。

故里重尋舊釣竿。碎琴意緒雜悲歡。雲邊梯棧蠶叢遠。
天末風霜雁陣寒。江驛歸心波浩渺。慈闈曼齒竹平安。
人生閱歷纔能悟。蜀道非難世路難。

題葉小鸞遺像

寫韵松陵有替人。鏡中形影夢中身。翠眉頰頰分明在。
欲喚飛瓊恐見嗔。

留得遺詩字幾行。人間難覓返生香。誰知桂殿吹笙女。
更向猊林禮法王。

眉子舒顰說硯緣櫻桃雨細潤琴絃蕉窗月暗鏗殘炮
差幸貞珉未化煙

似聞壘上記紅簫環佩依稀賦大招弔古祇尋埋骨地
吳江葉葉冷楓凋

次湯貞愍公

貽汾

絕命詞韵四首

天塹嗟難恃金陵故壘秋國殤繩祖武巷戰場忠謀危
堞堅仍破殘軍潰莫收前修吾自淑遑問世情尤

陸士衡文

賦練世情之常尤
識前修之所淑

易名丹筆注華袞勝陽秋故里安全贖崇祠卜築謀斂
形悲席裏雪涕翼關收債事誰尸咎偏甘忍諾尤

雅集邀裘帶前塵閱幾秋巡簷梅共笑展席酒先謀門

巷浮雲改琴尊掣電收殘縑留翰墨詩品敵蕭尤

公署

副總統時郡城父執諸君嘗邀公同集余家九梅軒繪圖紀事各系以詩今九梅軒化為市肆已二十餘年矣

雜誦懷忠錄

果卿年丈成烈所編公族子也

聲酸助灝秋能傳儒將度

善爲後人謀浩氣丹青託哀詞卷軸收彭咸遺則在忼

慨賦逢尤

嘉應廟前閒步

嬰弄場開集眾譁蘆棚招客話茶瓜閒游獨向笙歌外
負手循畦看稻花

題精廬小集圖六十四韻

圖藏沈柳橋

登瀛

處張秋水先生

鑑

所繪記妙

境庵祭鄉前輩事也柳橋撰南潯備志南潯藝

文補南潯著述總錄及南林鄉先輩私祀錄等
書惜中年遽卒未竟其緒亡友丁子香桂爲柳
橋外甥嘗以是圖索題余爲家蠱所困不復吟
詠諾久未踐頃因纂修鎮志檢柳橋遺書復展
是圖乃補系以詩蓋距柳橋之歿已十七年子
香之歿亦十三年矣

湖州府七縣倚郭首烏程縣東七十里鎮以南潯名涖
祐立鎮來六百有餘齡民物頗殷阜接踵多賢英文獻
久放失約略猶可徵或生長於斯或蹤跡所經其人三
十六季宋逮 皇清有以氣節著有以文藝鳴窮者爲
隱逸達者爲公卿要皆三不朽無媿鄉先生歿可祀於

社古昔垂儀型柳橋沈子曰是宜奉椒蘅瞽宗未及配
私祀禮亦應爰議定軌則其約同志朋祀事歲一舉舉
必以春正鎮西古蘭若傳自宋代營云有朱進士創以
守先塋本名厚德菴妙境後所更青陽好風日花竹麗
軒楹僧房遠塵仝靈爽或式憑虔恭設俎豆稽拜薦芳
馨品物雖不腆所貴將以誠蘊牆慕先哲古誼夙心盟
曠世意相感何啻雲龍并祭畢肅而退飲福集家庭鄉
黨莫如齒君子無所爭儀文相揖讓詩篇互酬賡如聞
號呶戒必有監史懲砥礪交致勗談讌各適情張丈推
祭酒作繪擘溪藤點染俚寫意六法師關荆呼之如欲
出肖神兼肖形柳橋諸掌故攷索最專精著述證存佚

紀載別渭涇備志藝文補一一仿吳興匹諸玉枕帖縮
本摹蘭亭別編私祀錄一冊付鈔謄誣詞辨譜牒軼事
搜碑銘人各爲小傳下筆心先傾進退寓微旨嚮往託
拳膺知人論其世想見其生平與祭者名氏羅列咸詳
明其名曰私祀其實乃公評此舉系風化矩範式里閭
用以誌勝集永永期相承惜哉九載後祭遂輟不行頃
余輯志乘簡要苦未能努力事編刻巨粒嗤蟻擎幸茲
先路導體例堪因仍姑作川學海遑詡藍謝青常慨風
俗敝思古寸念縈前塵渺難溯悵望徒盱衡何當更舉
廢後賢以次增庶幾滅復續弗替如傳燈憶昔壬寅歲
柳橋返化城遺物勤檢點似舅有佳甥攜此索我題歷

久卒未謦詎知丙午冬甥亦歸沈冥流九驚掣電良友
嗟星晨此諾不可負此詩今始成詩成里展卷感舊涕
淚零時咸豐戊午孟夏月在丁十九日子晡後時加
庚濡毫綴卷尾烏程汪曰楨

題金劍門

朝珍

所藏松雪墨跡卷十

墨雲寶氣纏牛斗祝融卻步不敢取蘭宇落水例可援
嘉話流傳在人口晶宮道人工八牘羲之之鬼運其肘
新篇偶效小謝體寄興霞桃共煙柳興策寺詩尤妙絕
諸禪可與坡仙友紙長六尺高一尺字徑寸許詩兩首
延祐庚申秋八月書於松雪齋南牖是時解組閱歲餘
蹤跡已溷田間安柴門反關多靜趣飛毫不染微塵垢

墨痕沁紙似猶濕品題當出陵川右穠纖得中骨肉勻
 貌雖妍麗神雄超高陽許初題卷端篆文詰屈蛟螭走
 遂昌跋語江村詩伯生曾觀識於後昔年得自常賣家
 三百驪珠入君手裝池既竟索題句君揖授余余揖受
 吟思苦澁詩未成度閣于今十年久三月六夜鬱攸作
 君家百物皆烏有幸哉此卷翻得存君心差慰余顏厚
 需遲轉覺可居功嬾惰誰知不我咎幾回展卷重摩挲
 神物塢呵信非偶煨燔竟逃燹怒劫弄藏好倩長恩守
 子孫永寶慎勿諛貞石吉金齊此壽

烈婦篇爲張烈婦作

慷慨烈婦心淒涼烈婦篇烈婦皇甫氏家居五湖邊父

日皇甫整桐鄉弟子員婦幼卽婉順父母所愛憐旣長
適張氏乃在潯溪頃夫婿亦庠生名模號槎仙移孝事
尊嫜靜好稱良緣結褵僅數載夫婿病不痊扶持供藥
餌中懷百憂煎不食兼不飲侍疾意所專六日夫竟歿
摧肝涕泗漣益矢殉夫志勺水不入咽親戚互勸慰此
志守愈堅夫歿後三日婦亦歸黃泉婦時廿七歲事在
丁巳年余方輯鎮志亟載入簡編頗訝小谷口湖錄勤
丹鉛烈婦舅姑存事跡盡棄捐自謫筆與削予奪春秋
權吾聞綱常義夫爲婦之天婦人有三從舅姑不與焉
矧茲夫有弟有弟婦亦賢屬以奉滫瀡色養定無愆他
年弟生子立後祀可延心安而理得何事更拘牽苛論

叢責備其然豈其然里俗久頽敝日下東流川幸賴節
義重巾幗猶能肩金李兩烈女有若雙壁聯凌玉成聘妻金氏梁
希鸞聘妻李氏並未嫁聞夫訃仰藥死一甲寅年事一乙卯年事今更得烈婦鼎足相
後先行看荷旌典綽楔標門前緹油記惇史不朽干
秋傳

家蓮渠鳳輓詩

海嶼仙龕早築成娉修難與命相爭達人哀樂中年感
老母摧傷暮齒情幸免妻孥遺後累徒留書畫說浮名
雁啼驚起西堂夢俯仰前塵淚雨傾

虛傳泰上有成鳩身世嗟同貉一邱黻面莫逃千佛劫
酸心先釀十分秋樂何如死人誰悟翁不聊生我亦愁

桑戶返眞翻足羨茫茫逝水日東流

吳臥山

文光

招飲賞杜鵑花

招邀吟侶許追陪商略平生醉玉醅
躑躅世途經閱歷芳菲春色費栽培
似聞蔣徑三三闕疑有殷家七七來
多謝多情賢主意索詩特地一尊開

哭蔣寄嶽

龔

海門之訃四首

追思風誼淚頻垂道路艱難訃到遲
歷亂家鄉兵燹逼迢遙江海旅魂悲
平生鮑叔能知我後世揚雲定屬誰
欲撫桐棺伸一慟歸人歸骨兩無期

回首苔岑樂有餘往來昕夕共聯裾
襟期眞率難諧俗論議清超每起予
磊磊緗緗常散帙勞勞鉛槧未成書

但教一卷傳身後何必遺編滿五車

通眉長爪藹如春廿載深交抵飲醕簪述不窺唐以後
性靈自曷古之人遣懷聊作無生話撫事偏留未了因
虛擬夢中尋晤語虔將神咒諷金輪

半年奔迸不同羣無定萍蹤去住分避地遠游依海角
浮家小泊近湖濱亂離多事誰堪此疾病餘生更哭君
他日讀書新有得復從何處一相聞

火輪船

舟製出西夷工技矜絕業炎燁火正功運幹輪人法治
鐵寓新意剗木殊往牒縱或短或修橫有廣有狹中央
竈突高兩側車轂夾釘杙聯首尾機械藏胸脅遲速各

轉旋彼此相筦攝鼓盪宵皮排推移憑版牘豕腹鼎常
沸象鼻筍斜插巧借烈燄衝利取大川涉向若雖無涯
問渡不用楫旁宜設銃弩內亦儲戈甲琛賁藉之通薪
蒸毋使乏風逆行更駛浪破勢先惰水程越千里晷度
纔一霎劇勝淪波螺頗訝揚葩蚰蛄如煙靄蒙霍若電
光霄長歌肱可扣疾走輶難挾角藝般倅驚競力孫盧
懾 聖代善懷柔荒裔皆臣妾魏絳旣和戎郭積曾觀
獵情早花門輸盟非梨樹劫質還錦璫羸往返舳艫接
羣盜方披猖良民未安帖曷勿效馳驅期以共諧燮咸
歡子儀迓勿類伯嘉謀敵愾封鯨鯢潛師擊鵝鴨日月
兵氣銷烽燧軍書捷勳將麟閣酬名與龍驤協再拜旅

葵篇四海 皇威治

憶別

三吳遍烽火故鄉難著我別後月依依夢中花可可

志感

雜誦古人詩酸吟太淒咽鮑昭行路難杜甫無家別

蘋花詩社詠上海古蹟四首

滬濱壘

晉袁山松禦海賊孫恩處又名蘆子城

遺蹤稽典午禦寇樹危旌漁蕪連三泖軍屯列兩城時
清誰習戰地險必交爭今古嗟同轍何當盜賊平

筆議軒

元彭汝器評宋史之所

雅擅專門業評量乙部書家風彭利用友道貝廷琚大

擴叢亭識全刊夾漈疏遺編今在否兵燹劫灰餘

最閒園

在烏涇賓興里至正中王原吉自橫柳梧溪精舍移寓于此

高士蹤曾寄烏涇築草堂巾裾聊自適簪紱久相忘略
遠干戈地仍開翰墨場桃源何處覓避亂劇奔忙

露香池

明顧名世鑿池得石上鐫趙文敏篆露香池字因以名園今青蓮菴是其故址

松雪留遺碣名園足嘯歌二分先種竹萬柄亂翻荷亭
沼形模改滄桑感慨多洗兵思壯士直欲挽天河

輓大司空張詩舫先生

祥河

二首

京華遠訃託哀鴻杖履追隨感素衷氣誼潛孚形跡外
風規時露笑談中愛才如命眞知我垂老無成竟負公
太息年來狂阮籍人間處處哭途窮

懸車齒過未言旋欲報君恩忍舍旃清祕緣仍娛日暇
艱難時敢惜衰年騷壇名重心彌斂魏闕憂深疾更纏
料得賜塋歸葬緩江鄉徧地是烽煙

陸定圖

以情

庚申紀難詩題詞四首

莽莽烽煙合鄉關涕淚滋長言歸詠歎浪跡苦奔馳杜
甫愁無奈唐衢哭有辭問天搔白首定亂果何時

黯淡湖山色塵氛十丈高飢民無寶盎悍將自旌旄列
隊軍爭潰懸門吏禁逃巖關誰守險偵探竟徒勞

烏戍田園在摧殘廢鑿耕諸君甘譽賊老子敢論兵禍
冀天心悔城宜眾志成滴澆難復古太息四維傾

一角瀛壖地人言此樂郊彈丸鶯出谷棲幕燕營巢壘

夢魂猶怯哀吟手自鈔相看未流殍聊與共推敲

題王叔彝

慶勳

憶槎圖次其自題原韵四首

干戈歷亂徧江東莽莽鄉關涕淚中浪跡無依頭早白
劫灰未燼火猶紅誰知地主難爲主我恨天公太不公
肯以飄零頽壯志飛揚莫笑九秋蓬

卜居君昔別營巢側近槎溪好結茅半榻琴書聊自樂
一庭草樹鎮相交筆牀茶竈塵襟浣藥砌花闌夢境拋
問訊東橋舊時竹春殘可放出牆梢

指點頽垣斷井邊尋盟鷗鷺也知憐枯筇瘦屐來何處
明月清風值幾錢空有詩篇懷鹿柴可無畫本倩龍眠
盛衰閱歷原常事滄海曾經變作田

靖寇將招破膽魂釣游省識舊巢痕鼎新池館須重築
邁古文章待細論運策早知才略富開尊仍接笑言溫
功成身退堪娛老通德還應署此門

寓滬寫懷貽王叔彝四首卽用前韻

田廬空憶畝南東多病餘生患難中夷舶帆飛滄海碧
軍屯烽逼近郊紅移家避地依孫宰置驛通賓感鄭公
幾許他鄉羈旅客翻教蹤跡合萍蓬

羨煞鷗林許寄巢難尋一把葢頭茅薄游漫擬登樓賦
長揖誰容戴笠交結客劍縱愁裏看傳家書帙燼餘拋
無聊忽作憑虛想蔗本回甘勝蔗梢

蓼辛荼苦徹中邊未受人憐早自憐雙袖龍鍾惟有淚

一囊羞澁更無錢追隨北海開尊醉魄獨南州下榻眠
太息儒冠真誤我不營貨殖不耕田

浙水遺黎繫夢魂識君鴻爪雪中痕能官秩自三遷速
退賊功曾一戰論大易同人金可斷小戎君子玉尤溫
清談喜接應休慙莫訝袁生數款門

題沈揖甫

維裕

曰可讀圖次蔣海珊

堂

韻二首

一緘芳訊藉鱗鴻十載神交積素衷卓行獨尋唐史傳
高懷綽有晉賢風煙雲揮灑詩篇富花竹蕭疏畫本同
好片樂郊吟嘯地移家安得向圖中

清裁奧旨渺無涯品到中條更孰加風雅之間繞樂事
宋元以降幾名家偶因避亂居同谷頗亦耽吟慕永嘉

入座欲參佳士列鬢絲惜已負春華

戲詠紙鳶禁作衰颿語

紙絳筠青費翦裁乘風小試不凡才放晴村落嬉春處
得意兒童下學來翀舉天高紅日近搏扶路遠碧雲開
絲綸在手憑舒卷空闊郊原往復迴

春仲偶成

料峭餘寒尙有威征人未許解棉衣鶯花二月春無賴
江海三年客未歸逆旅浮生萍泛泛他鄉離緒柳依依
衡茅棲燕巢偏穩不向雕梁近處飛

送鈕詠薇

福弼

之上海次潘芝雲

玉璫

韻

時同客
崇明

惆悵殘春把酒時黯然情味鬢添絲風波未定今猶昨

蹤跡無端合又離
旅燕尋巢難自主
啼鶯訴怨更誰知
故鄉此日饒樓筍
我亦平居有所思

過陳金門鏞新居二首

近市居偏好依然仲蔚園
南簷收宿雨東牖納朝暄
賃廡蘆垂箔分鄰槿結樊
攜家堪避地此處卽仙源
伊我相過從忘形爾汝交
苛儀刪揖遜款語雜諧嘲
浮蠟開春甕燂雞出夜庖
往來途不遠莫厭戶頻敲

沈補蟾瑩壬戌紀事詩題辭二首

回首重圍裏危城咽鼓笳
兵驕難借箸食盡困量沙
是豈魚龍厄相傳郭璞有言吳興永無兵火之災終有魚龍之厄翻成兕虎嗟
餘生

逃浩劫此別已無家

紀事傳哀唱淒清抵聽筇鄉心同結夢旅跡偶團沙意
氣君偏壯飄零我亦嗟從知杜陵老信史屬詩家

題王雪汀

偉棠

寒江獨釣圖

東海騎鯨渺難逐熱惱紅塵插雙足不如一艇泛寒波
聊爾垂綸樂幽獨妙年器宇終賈儔是豈荒江漁者流
紛紛肯效世閒態落落常昂天外頭紅衣危坐江之澚
好片圖中乾淨土江鄉滿眼是烽煙此境不知何處所
平生我亦甘逃虛亂離逼切趨窮途蝮蛇何足齒吾劍
蒯緱偶映歌無魚網利釣名無一可衰雪盈顛與時左
空聞人世有仙源欲往問津嗟未果白水浩浩蒼山高
狂奴故態依然豪終期結伴訪龍伯濯足扶桑策六鼇

許烈姬詩

青泥蓮花羅往牒清漣濯出田田葉子今又得許烈姬
乃是洞庭東山朱氏妾姬本維揚鄧家女幼失怙恃育
於許字曰香賓名德蘋就塾卽能工韻語後隸樂籍中
覓死無死所所耽惟詠吟不肯習歌舞朱君子鶴瀟洒
才貽以詩句作鴆媒委身侍中櫛廣唱相追陪曾和漱
玉詞欲與清照爭清裁閨房艷福人所羨誰料黑山青
憤紛然來舍後石家陽竄伏在草莽此身一旦落賊手
胷賊斯能免淫虜賊刺以刃右臂殘一臂雖去一身完
左手拾石擲賊面斷脰氣絕摧心肝吾讀易安所序金
石錄避亂倉皇猶在目如姬所遇抑更酷事在辛酉二

月朔是時姬年三十六嗚呼一死可勵孝與忠泰山豈
與鴻毛同從來立身貴晚節勿論其始論其終大吏封
章告天子詔以綽楔旌其里君不見宋代毛惜惜
高郵倡女耳英烈夫人有廟祀列傳千秋垂正史

題凌忠介公遺像

浩氣千秋在遺容幸拜觀憂時雙鬢白誓死一心丹仍
世清芬守孤忠大節完可憐陳魏輩例作閭臣看

題廬湘泉

蘭初

兩腋清風圖

玉川先生擅詩騷條煩之子爲深交數閒破屋洛城裏
身藏人海離塵囂羅胸文字五千卷腸枯肺渴須頻澆
風流已往家學在淵源不隔千秋遙臨風玉立倍瀟灑

通眉長爪清而超品泉時喜作茗飲駢列甌盞紛鑪鉞
龍團鳳團烹活火螾眼魚眼浮圓泡籠頭紗帽坐微噉
閉門靜聽松生濤仙靈可通良不妄虛襟颯颯吹輕颿
由來佳茗比君子評量品格區釐毫坡翁作詩工罕譬
不妨如黯如寬饒彼哉安昌非骨鯁有名無賴空騰嘲
持身立志宜鑒此回甘諫果齋冰操豈徒煎水誇綠腳
特與逸士爭孤高我生嗜酒兼嗜茗醉餘森伯相招邀
陶陶此樂日難狀花乳何必輸芳醪誰云七椀喫不得
百川一吸驚鯨黿詩脾沁後鬪傑句吾雖衰矣猶能豪

玉鑑堂詩集卷五

玉鑑堂詩集卷六

烏程汪曰楨著

同邑後學劉承幹編次

冬日學舍病中作

忍飢甘作紇干雀腰纏莫羨揚州鶴冷官破屋風騷騷
頌酒弦詩亦云樂奈何小極忽見侵一熱一寒相間作
困眠無復縱談豪可惜知交盡離索區區微祿豈救貧
斂版低心不知忤名爭利奪紛勃歛安得天游祛六鑿
姑吟苦語遣病魔或者病魔能退卻君不見古來文章
勝良藥檄愈頭風詩愈瘧

正月十四日同沈肖巖

閩崑

郭怡孫

慶集

沈丹卿

拱樞

朱萊雲

志成

陸葦笙

采

游七星巖壁閒有

吾鄉俞蔭甫 樾 舊題因用其韻

清游勝侶箋同擘，蠲醞開尊湛深碧。共乘小艇泛春波，
更倚枯筇凌絕壁。嵌空峭拔中有屋，上下左右無非石。
吳興清遠憶家山，竹圍屏障松張帟。弁陽大小兩玲瓏，
闢此幽奇恐顏赤。洞泉自暖不成冰，石髓無風尚流液。
爛柯曾說棋一枰，洗鼎欲尋茅九脊。久懸魂夢今始到，
多謝巖扉爲吾闢。登高乍覺眼界寬，臨虛早拓胸襟窄。
自疑足底白雲生，蠟屐飛空了無跡。擬倩丹青圖以歸，
臥游長慰煙霞癖。酒酣狂語問山靈，此地幾回逢此客。
開元寺是唐末董昌故宅，寺在清道橋東，史言昌居清道坊，卽此地也。
昔坐金牀兔，今爲紺宇鸚。關門自娛樂，卜宅此經營。橋

古留清道樓高望子城
昌儲位于子城門樓卽威勝軍節樓今爲鎮東閣
春林
聞鳥語猶解說羅平

秋末偶題

清秋佳日稱清閒
莫惜流年去不還
楓葉紅殷嵐翠活
風光偏在夕陽山

曾憶春時發眾芳
一番風雨盡殘妝
孤高不逐繁華景
瘦菊籬邊尙傲霜

九月十三同沈丹卿陸葦笙孫震惠
家楣
孫藹言

世芬
放舟至婁公村登岸行五千六百步至蘭

亭一游又入天章寺小憇歸舟成詠計五百字

越中山水佳處處快吟
眺蘭渚修禊場勝地名尤噪我

來逾兩年每恨足未蹈暇日約朋儔同放山陰櫂維舟
臨斷岸村落劇清奧籃輿價苦昂蹇衛性多驚不如雙
蠟屐徐步入幽峭意行不識路姑倩一僮導登山比讀
書鼓勇乃深造紆迴七八里到眼皆詩料淺沼浴鵝鶩
削壁竄鼯鼯囊佩擷菊莢巾礙胷藤蔦修竹與茂林半
爲野火燎崇山卻如故紫翠嵐光照幸有良宰官

山陰令楊

君生吾
名恩樹

力與闢蓬壺高亭將落成闌檻青紅曜一條長

約橫四面短垣繞言尋流觴處疊石紛磽礧止水無激
湍竊恐坳堂膠風流溯晉賢懷古聊舒嘯平生樂疏曠
煙霞適所好邃境移吾情省識山棲妙惜未攜琴來一
撫成連操次訪天章寺破剎依巖隩坐憇拂苔階落葉

無人掃聞昔宋六陵劫邁番僧暴義士收殘骸抔土於
茲窖冬青樹不存故址孰憑弔回首攢宮村相隔遠難
到遺跡此久湮虛稱彼猶冒信否無可徵流傳徒耳剽
試以問山靈默然不吾告富貴一刹那功名兩虛耗賸
有古先生觀空夢早覺達人齊彭殤妄作未敢誚嗟予
竊微祿斂版事年少庶幾誓墓文或藉持風教柴桑薄
五斗歸寄南窗傲何妨吟乞食飢驅冀冥報置身清淨
區輒悔辭耕釣興盡方下山心戀項重拗佳處雖未周
大略領其要足倦行次且路側樵夫笑還舟息腰腳舉
酒互相勞援筆紀以詩倚篷共推敲更期續舊游留題
當劑約從今魂夢聞不忘此雲嶠詩成頗自喜滿引深

八十六
杯醕時屠維季秋節已過落帽同游者五人四賢一不肖

柯亭蔡中郎祠

陳留君故里越郡此荒祠過客名長在知音鑒特奇荆
榛鄰廢寺風雨蝕殘碑安得邯鄲筆新刊幼婦辭
洵美稽山竹森森个萬千無因裁作笛只合用爲椽咫
抱嗟誰賞姱修黯自憐風塵能物色終古幾人傳

柯橋鎮

抱水成鄉聚炊煙萬戶生魚鰕朝市賤燈火夜橋明聽
笛柯亭近評茶日鑄清七星巖在望游興阻巖程

壽吳臥山六十

從來繕性得長年見說靈椿歲八千
霸子鴻妻同隱逸莊襟老帶卽神仙
未衰精力干戈後無限風光杖履前
笑我還應誇穉齒殷兄張丈喚當筵

十餘年久訂心知西塞盟重問鷺鷥

時方同作西塞山之游

老去

曠懷仍縱酒生來結習總耽詩卜居比舍門常叩訪勝
連舟櫂共移一段深情何以報報君上壽邁期頤

哭紀石齋

磊

四首

一封遠赴起哀聲卅載苔岑憶舊盟垂老鬢眉皆道氣
率真肝膽此交情襟期疏曠貧非病著述流傳死亦生
欲訪仙龕通問訊大千何處化人城

老屋殘書雜卦篇精研消息守韋編町畦獨闢王韓外

閩奧遙探費孟前三古遺經函萬象一生絕學定千年
揚雲後世應堪冀自有潛虛準太元

萍蹤葭思兩相違彈指前塵是也非亭角聯吟風滿袖
天涯感逝淚霑衣茫茫古昔高懷寄落落乾坤舊雨稀
桑戶嗟來翻足羨返眞從此脫塵鞿

微祿羈人不自由一官匏繫耿離憂徐陳兩地空懸榻
李郭三春偶共舟卜兆期君謀丙舍束芻賸我託庚郵
待鐫樂石傳風誼無愧中郎筆底收

題葉詞生

廷琯

重見故山樓遺像

名勝推吳郡茫茫付劫灰青山幸無恙白首復歸來興
爲高吟發情如噩夢回劇佳娛老地可惜遽泉臺

回首忘年契披圖百感并
聲名終不朽風采儼如生
蛻骨仍先壟招魂已化城
樓空遺蹟在懷舊涕縱橫

讀許海樵

旦復

紀石齋

系

遺詩用丙辰年舊韻

苦耽吟事忘羈飢風采平生憶
素髭閱歷干戈身似寄
淋漓楮墨語尤奇老成幾輩嗟
先逝年少將來孰我知
太息衰齡況多病可堪和淚爲評詩

和宗湘文太守

源瀚

重脩愛山臺落成用東坡游

道場山何山韻

吳興郡郭枕山麓多少園亭變陵谷
吾家賢丞昔築臺
城市山林幽趣足紅芳白棘何漫漫
仄徑一彎秋蚓盤
磴敲址塌不可步急雨瀉落成奔湍
華嚴樓閣彈指出

依舊山光照吟席幾株古木尙槎枵或者猶爲宋時植
捲簾日日對螺髯斟酌攀躋撫卹間清遠名區此雪水
循良太守今眉山百年冉冉眞昏旦自媿勞生已強半
追隨五馬快登臨差幸中郎識元歎

題趙青士

筠

遺墨二首

紛紛螳賊滿鄉枌六合梟鸞孰與分身世無端罹此厄
天心幾欲喪斯文餘生矢志完忠孝故物傷懷惜典墳
珍重數緡遺墨弄長留後葉誦清芬

我昔飄流寄海壖萍蓬異地兩心懸無繆孤憤徒爲爾
忽幸生還亦偶然鸞鳳鍛餘龍性在虎狼叢裏鯉書傳
幽吟往事嗟如昨此日何從叩九泉

李鶴杉

日熾

有詩留別次韻二首

牆緣薜荔戶編荆冷署依然物外情箋擘剡藤重膝促
尊浮越釀共心傾團沙聚散渾難料舞絮升沈了不驚
安得買鄰拚百萬昕昏過從送還迎

似聞排日泛游船可惜恩恩別緒牽我自之江尋古渡
君猶於越證新編煙雲翰墨詩中伯筇屐精神地上仙
欲爲士衡焚筆硯緩吟低諷足窮年

同治壬申元日余生於嘉慶壬申時年六十有一

矣

問年周甲子紀歲復壬申耐冷江梅古扶衰越釀春壽

逾三世永

先曾祖年二十四先祖年五十九先君年五十八

身託一官貧冠帶

從來懶翻嫌客刺頻

處默

處默冬心抱澆風不足論
雞蟲誰得失燕蝠各晨昏
逢世詩書賤催人歲月奔
摩兜韃有戒深慮舌難捫

題唐雪航教授

廷綸

寒江獨釣圖遺照六首

鬚眉雖古貌依稀兀坐無言是也
非耐冷吟肩山字聳飛來鷗鷺共忘機

瓜皮小艇傍危灘靜者高懷寄一竿
寂莫更無人作伴滿天風雪滿江寒

賀監歸山賜鏡湖元眞蓑笠隱西吳
平生宦跡都經徧寫入荒寒水墨圖

絕勝紅衣畫本傳羊裘一領自年年
擘音已歇遺言在付與蒙莊作外篇

卻笑漁人黃道眞偶逢靈境未離塵
仙龕海上今何處從此花源阻問津

投老尊鱸興尙豪一經家學授兒曹
英英後起清芬誦待向瀛洲更釣鰲

題曝書亭集風懷二百韻後用東坡芙蓉城韻

竹垞先生風懷二百韻乃長律中傑作又有靜
志居琴趣詞與詩語皆印合相傳晚年編集不
肯刪此詩有寧不食兩廡特豚語楊氏謙注曝
書亭集因是遂有妻妹之疑夫六一簸錢出於

仇口若楊氏者何爲也哉後有作風懷鏡者力
爲辨誣其意良善乃必實指爲妓女王三姑無
徵不信此又癡人說夢矣余攷先生江湖載酒
集有自題詞集解佩令云老去填詞一半是空
中傳恨幾曾圍燕釵蟬鬢然則先生固已自解
之後人紛紛辨論皆隔膜語耳因賦此詩自謂
大正復生定必爲吾首肯也

鴛湖詩伯歸窅冥吟魂何處招零丁生平篇帙羅几屏
偶耽綺語摹姪婷蛾眉自翠蟬鬢青浪傳太白妻嬋星
相通以神不以形美人香草離騷經古來詞家託仙靈
王母綵勝天孫駢寓言倣詭豈實有但佐翰墨流芬馨

特豚甘謝孔廟廷或勸刪薙終不聽微詞自表孰所令
暗室開牖明疏櫺空中結想藉傳恨歎要奚啻遺真冷
制科赴召辭巖局挂冠返里旋鍛翎前塵羅預驚迅遽
曝書千古留空亭道山應創新宮銘餘子學步嗟伶俜
無人能解虎頭鈴夢中說夢殊未醒厚誣先哲心難寧
奈何小智矜挈鉗紛紛臆揣蚊雷熒開編雒誦涕欲零
伊誰爲滌聞惟腥管窺穹宇蠡測溟浮言莫泛無根萍
心猶嘉禾碩且庭無邪首貴驅螽螟爰題此詩告億齡
勿歌倩盼疑譚邢

禹陵

探穴今枯井依巖此古阡垂庭無橘柚畫壁尙山川明

德思終遠真冷旨孰傳勒銘尋窆石永建失題年

窆石題字

已模糊不可辨

自歎

虛名無計擲儒冠冷宦羈棲興早闌社櫟餘生嗟善病
溪蓴鄉味夢加餐忽通忽介趨時拙何去何從問卜難
耳聾目昏行步蹇可憐猶自戀微官

西湖側畔人家

竹戶茅檐破冪遮溪脣山脅半人家葭蘆斷處危橋出
楓櫺陰中仄徑斜在昔無村不花柳於今有地盡桑麻
底須重憶繁華夢勤儉民風儘足誇

旅舍遣悶偶拈舊句衍成五首

滿城風雨近重陽
枯坐無憀黯自傷
入世有生皆逆旅
索居作伴只行裝
久疏故友琴尊會
絕少新知翰墨場
一枕瞢騰耽睡味
蘊蘊化蝶儘徜徉

半道無端滯古杭
滿城風雨近重陽
湖山咫尺游蹤阻
鄉井睽違旅夢長
萍梗心情非故土
菊花天氣已新霜
撈鰕照鱗兒嬉處
閒煞蒹葭水一方

悲秋九辨此時光
閒恨閒愁費較量
到處鶯花殊上已
滿城風雨近重陽
趨炎斂板馮唐老
塌井銜杯杜甫狂
歸去來兮應早賦
折腰五斗爲誰忙

回首清河昔日坊
一番噩夢劇淒涼
荒郊漸闢新耕壟
廢壘猶存舊戰場
徧地烽煙經幾載
滿城風雨近重陽

可堪衢巷泥三尺跬步艱難抵太行

簷端終日聽淋浪屋漏牀牀苦夜長無用阮孚雙破屐
自羞趙壹一空囊幽懷抑塞成詩境快意優游賸醉鄉
差幸催租人不到滿城風雨近重陽

輓李拜花

攀鱗

卽寄鶴杉

拜花父

乘除吾欲叩蒼穹夏綠霜凋感寸衷珠樹才名方藉藉
玉樓召命太恩恩故鄉接壤居非遠異地傳郵訊屢通
桑戶返眞宜作達彭殤松檟總虛空

爲羣拜紀夙論交同守寒羶世所嘲鵬集先驚符買賦
鶴鳴誰和廢羲爻更難入夢尋高惠聊復推天慰孟郊
長爪通眉人已古城南莫訪舊吟巢

會稽山陬僻處有數家臨水結茅頗足幽趣
傍澗開松牖依巖築薜垣駛流魚闌絕仄徑虎夔藩逖
跡思歸隱勞形笑撥煩故鄉清遠地處處足邱園

旁觀

巧宦脂韋舉世皆靴皮覩面託談諧甘蕉縱已彈章被
苦筍何曾致仕差處已如棉眞善耐汗人猶膩恐難揩
旁觀乾笑聊相應應道卿言亦復佳

殘冬

殘冬風雪裏冷署少人來久病吟情溢長貧傲骨摧妄
希名不朽敢謂世無才大好尋紅友嚴寒且一杯

縱筆

三六
牆蒿縱覺遜山苗失路蒼黃得路驕
螻蟻烏鳶誰予奪
鯢鵬蜩鷲自逍遙
士師未必甘三黜
刺史何曾守六條
一例道旁芻狗棄
屈伸臂頃已薪樵

讀後漢書戲咏遼東豕

一生短柵伴雞棲
誰遣修蛇共品題
自詡白頭堪上獻
終然刀俎付屠割

南潯長生塔院兵燹盡燬近新構
臨水數椽小憩
題壁

臨溪重結宇非復舊鬼峩煙外菱歌遠
風前梵唄和地
偏過客少水近得秋多
亦有誅茅想勞生奈若何

夢游靈隱山

古寺平生幾往還夢魂亦繞翠微間巖隈何幸開初地
縣治曾聞在此山泉可洗心須是冷石能礪齒不妨頑
龍宮驚嶺嗟難到且擬禪棲學閉關

讀陳忠裕公年譜有感于許都事偶題

殉國忘身早矢忠知人鑑別孰能同推襟結士謀原壯
破格掄才願竟空風雅儒生堪上將椎埋惡少有英雄
當年李祐偏僥倖赦罪終成入蔡功

春日閒詠

卉木饒生意禽魚得靜機虛襟方澹蕩韶景自芳菲立
志千秋在知音四海稀隨緣皆樂境童冠可同歸

學舍春夏之交翹搖菜作花徧地皆是爲詠二詩

相思子美折紅苞曾記風詩賦鵲巢省識羹材勝藜藿
芙蕖縮本漫騰嘲

野菜逢春也坼苞種分大小其名巢藉非蘇陸詩翁筆
無用難辭蔓草嘲

庭前月季花盛開

啼鷓語蟀換光陰白白紅紅自淺深
歷境炎涼原轉瞥
隨時開落總無心倚闌獨賞宜飛盞
揜袖頻拳慣上簪
一度月圓花一放天教日日伴清吟

和沈肖巖元日

慣守青氈閱歲寒春筵又見薦辛盤
往還通脫刪苛禮
觴詠蕭閒稱冷官
隱几其耽研卷帙趨炎自覺懶衣冠

明知宦味同雞肋爭奈邯鄲夢未闌

君方重擬出山
余則欲退不果

示肖巖一首

非工非賈亦非農自顧年來覺倍慵
不舞欲儕羊氏鶴有言曾駭葉公龍
虛名在口終何益好友傾懷豈易逢
回首鄉園歸未得曉鴉啼後夢方濃

老病遭人厭棄深多君杖履每招尋
羅胸萬卷耽經史放眼千秋論古今
冷宦閒情惟劇飲腐儒餘事亦高吟
縱談漫索旁觀解莫逆相看一寸心

許掌卿

慶豐

以尊甫又邨

秉辰

夢巢遺詩三卷見

示題後

收拾光芒入苦吟冲霄劍氣竟銷沈
應官書記推能手

報國勛猷負夙心幸有後人承絕業庶期異代得知音
此才終老蓮花幕撫卷低徊感不禁

題朱文肅公家書冊

先民自古曰在昔平涵居士有遺墨綸扉元老眞柱石
惜哉早告歸鄉國權璫曾以邪人斥轉令青史褒清直
均田一議名藉藉閭里懽呼省徭役當其委蛇方退食
貽書訓子垂軌則庭誥傳家後人式二百餘年珍手澤
一自荏苒烽火逼雲煙過眼徒追憶賴有賢裔勤物色
如璜繁弱失復得錦暉裝池重拂拭眸容彷彿如可覩
兵戈劫餘留此冊墨采猶騰光艷赫清門世世食舊德
子孫永保期無極

西湖道中二首

一鏡平湖路不遙
寶雲山色宛相招
籃輿小憩尋詩處
獨立長橋望短橋

倚山傍水好村莊
風景依然擅勝場
試上蘇公隄上望
外栽楊柳內栽桑

偶成二首

羣矜巧宦鑿天真
搏土媧皇化未神
試看愚氓皆自用
世間安有引縈人

巧辯儀秦古所傳
後來更覺勝從前
田巴倘使生今日
觸處皆逢魯仲連

太息

太息光陰駟隙馳青衫白髮老彌衰鄰家簫鼓迎新婦
是我來時乳下兒

讀後漢書雜詩二十四首

白水真人帝業隆雲臺諸將盡儒風一端猶自沿新莽
學術沈埋識緯中

西州漆簡免秦燒孔壁遺文日月昭太息陋儒成聚訟
罪魁百兩又梅姚

升中告祭本先王儀記虛煩事侈張鉅典從茲弁髦棄
徒知漢武與秦皇

位列三公未免癡故交折簡進規辭懷仁輔義全要領
果是癡人那得知

揚塵鳴鏑日紛紜衛霍勛猷杳不聞天意暫教邊警息
匈奴南北二庭分

熙皞重開政理平易儲易后卻無名能令風俗趨醇美
端賴明章善守成

耕牧中多有用才歷朝教化早栽培兒童習慣知觀感
取士皆從孝弟來

毛錐三寸足編摩漢史成書永不磨試問封侯班定遠
勲名爭及乃兄多

徙民發屋計謀乖鄧隲征羌困負柴野祭伊川徒浩歎
解嘲聊藉罷朱崖

能求賢俊列臣鄰楚楚何妨對士人外戚易隆偏易替

獨容閭豎敗黃巾

用人新格限停年咫尺角華顛果孰賢怪底郎官授童子
甘羅能否勝顏淵

禁中定策恃椒房竟使如弦死道旁胡趙可憐真糞土
清河貽害一賢王

父張母趙感恩深周召刑餘未足論料得愼園松柏下
仁皇泉壤暗聲吞

血書託妄汨春秋誤解新周作黜周坐使公羊精義晦
俗儒吾最恨何休

黨錮雖嚴志不摧薰胥一網劇堪哀俗清政濁分涇渭
士氣難支國步頽

賊臣廢立擅刑誅抗議尙書捋虎鬚涿郡名賢遂經術
瞽宗何意黜先儒

向闕迴戈託報冤文和小智罪難原縱云救死非稱亂
塗炭生民在一言

臧陳殉義競捐軀二烈同歸德不孤他日韓珩眞幸免
從知畏死必非夫

復諫安能據冀州田豐沮授枉良謀城亡豈待漳河決
況復家庭自寇讎

周書特創傳楊忠此例曹瞞應與同大業已基身未篡
生前終是漢王公

區明風烈殿文姬徐淑雖賢乃見遺方術亦無張仲景

叢亭惜未有箴規

辦香班馬共濃熏序論多承華嶠文不有注家標舉出
千秋寂寂歎無聞

漢世文章重作家過秦誰敵賈長沙蔚宗縱亦推良史
筆勢雄奇漫自誇

劉昭博贈夙稱佳改作無端肆觚排注補幸存三十卷
通人未肯信章懷

得上海李梯雲

邦敏

書中述吾友南匯張嘯山

文

虎語感而有作

未習脂韋媚世資閒官冷署且棲遲四愁平子兼多病
五短文通祗自知尺素偶然貽友訊寸長何敢作人師

青雲冠蓋多如許齒及衰翁恐未宜

偶諷杜詩計疏疑翰墨時過憶松筠二語卽以此
十字爲韻

農工及商賈竝天所位置吾皆不能爲讀書卽生計
尋花游興嬾得酒壯懷舒但使子心樂何妨與世疏
堪歎才華盡徒嗟筋力衰終然耽道味自信不須疑
志士平生懷斗筭何足算隨地有蓴鱸思歸笑張翰
紛紛達與窮人人競謀食誰能區品流八儒更三墨
籍甚傳浮譽矜才互炫奇可憐航斷港到海恐無時
衛侯鶴乘軒葉公龍入座信古薄今人自省知吾過
泉臺有兩親塵世無妻息塊然一窮民畢世徒追憶

年齒壯而老光陰秋復冬雪霜搖落處自有後凋松
學易宜憂患潛研閱幾春韋編今欲絕更爲削青筠

愁顏

禮自先王設詩偏小正刪古今消得失中外潰防閑大
地龍蛇厄羣夷大豕豕廟謨饒勝算藉可破愁顏

讀史記雜詩七十首

河洛苞符降自天庖犧畫卦乃眞詮紛紜推測渾難信
太古圖書久失傳

僞託三墳屬構虛黃農文字苦無餘醫家差幸留遺法
本草淵源素問書

太康沿汭失邦哀未逮唐虞政已隕齒冷冬烘村學究

動誇萬世太平開

莫把商周例暴秦不因亥正秦冬春試尋史表編排處
端月分明屬建寅

貪利惟知嗜貨財列邦游士總庸材金三十萬諸侯盡
鬪狗連雞劇可哀

邯鄲遺胄入秦中有志顛嬴乃自宮羣詡夥頤初發難
更誰能識趙高功

先發攻秦亦善謀八千子弟一時收逃亡桓楚猶天幸
無罪殷通竟斬頭

咸陽焚後返彭城苦爲三齊正用兵信越縱推能助漢
首功吾意屬田榮

大義君親豈可忘賣交酈況亦何妨奪侯他日終罹罪
地下無慚謝呂王

頤神長信翟禕膺據腹蒼龍有貴徵幸免幽囚人彘禍
壽終終得葬南陵

孝文夕入未央宮壯武頒書爵秩崇卿子冠軍非罪死
遺孫乃建代來功

緹縈官婢自心甘從此仁恩竟普覃高祖入秦惟約法
如何仍有肉刑三

燕齊迂怪共流傳五利文成競比肩見說還丹能不死
馬肝乃可殺神仙

此事先朝苦未遑崇儒孝武舉賢良傳經重學論勲績

首屬文侯與獻王

二城未拔且徐徐身後知心有太初齊立法章猶不問
樂君未免計謀疏

失計徒嗟太子丹誤將嬴政當齊桓縱教生劫誠何益
輸與相如璧竟完

中山規取志終諧胡服英雄孰與儕餓死沙邱探雀鷄
禍胎只爲寵吳娃

國家昏亂見忠臣天下羣雄共畔秦周市雖能迎魏咎
章邯一擊遽亡身

追隨故主就封疆燒棧東歸智計長假使韓成身未死
漢王安得用張良

區區海島困長鯨恐似誅韓更醢彭五百人皆甘自殺
王侯未可餌田橫

自古功臣不可爲空云閣散可相隨藉非衛尉能規諫
幾使蕭何作李斯

亡秦法令歎牛毛獄市何煩異術操會得蓋公清淨意
歌呼日夜亦功高

瞿參畫一代蕭何後起誰能襲白科若綜歷朝論相業
此中媿媿備員多

美如冠玉豈長貧戶牖鄉中一細民他日贊成封產祿
幾曾爲宰得平均

起自吹簫織薄中後來賢子亦英雄絳侯入獄條侯餓

孤負安劉不世功

良賈深藏柱史官五千言覓解人難無爲至教參元化
卻被人訶作異端

寓言十九異儒宗畏壘亢桑不可蹤汗濱卑棲藉藏拙
漆園未足嗣猶龍

異同堅白旨難參附和爭名共討探孰意後儒師孔孟
性天太極亦空談

善說翻教死說難爲韓故託可亡韓修明怯制非無補
慘礪無恩乃禍端

吳宮教戰集紅裙以戲爲真亦創聞何似穰苴斬莊賈
美人終竟異監軍

殺妻棄母拂人情吳起徒誇善用兵從學曾門遭屏斥
更聞上蔡背荀卿

刻薄原非五穀儔自知難可比殷周趙良藥石徒爲瑱
轉瞬彭池已見收

志切梯雲逞舌鋒原無定見在心胸可憐金盡貂裘敝
改計連衡換合縱

抵掌羣侯亦壯哉機權全自揣摩來一時形勢皆囊括
始信蘇張未易才

同師授法有薪傳智不如葵亦可憐幸得成名眞豎子
誰言孫臏勝龐涓

姦人任俠互稱雄六萬餘家聚薛中諸子紛爭夷滅盡

馮驩三窟果何功

竊符救趙破秦軍智勇深沈迥出羣可惜天將亡六國
婦人醺酒信陵君

貪利從來智必昏漫持苛論責平原若教專任廉頗將
趙國終然社稷存

不恤窮愁相印捐名駒千里更稱賢吾從戰國求良士
只有虞卿魯仲連

縱去咸陽一布衣能令太子早亡歸李園進妹疑誣構
莫比居奇呂不韋

當日趨炎比漆膠一朝失勢等閒拋信平此客言堪佩
天下無非市道交

謠詠蛾眉困左徒阻行進諫有良圖頗疑君實編通鑑
不載離騷見獨殊

弔屈投書意不平雒陽年少早知名未登大用身先喪
空說孫枝列九卿

輕生刺客費窮搜怪底要離不見收吞炭漆身眞義士
餘人同傳總堪羞

威名震主必招尤兩利俱存策最優國士雄才偏寡斷
狐疑不聽蒯通謀

柱下方書職所專先秦律算賴師傳身長八尺肥如瓠
免斬偏教享大年

說下田齊七十城高陽落魄一狂生淮陰兵進誰能止

未及論功已就烹

力阻匈奴不可攻和親一策卻難通單于弑父妻羣母
子婿安能敬婦翁

始信儒宗自有真兩生不附面諛臣居然縣蕞朝儀定
卻使諸郎詡聖人

季布髡鉗賣作奴苟非走越卽奔胡請看丁固鍾離昧
項氏臣原可盡誅

勸除晁錯是袁絲究竟君王意早疑但戮謀臣謝吳楚
底須三族盡誅夷

盜嫂遭誣不自明不疑貌美實無兄古云息謗宜無辯
安用嘵嘵好立名

扁鵲倉公地上仙
神人授受禁方傳
良醫功可齊良相
治疾須求技十全

廷中處士曾公卿
老賤何嘗遂見輕
黃石圯邊曾進履
後來韞解又王生

北平英勇世無雙
天譴知緣戮已降
李蔡下中終自殺
封侯幾日擁麾幢

萬斬猶難蔽厥愆
兇酋首未藁街懸
劉淵後世偏尊奉
躬祀南郊用配天

節儉持躬學晏嬰
迹同節詐受譏評
能將俸祿周賓客
布被良非爲釣名

龍川小令等椎埋
陸賈雄談快壯懷
黃屋稱尊能變計

趙佗大勝井中蛙

竊婦歸家四壁居長卿爭及藺相如子虛封禪徒華采
賴有長楊諫獵書

知嗤吳凜拙謀猷欲塞成皋亦謬悠伍被果能工畫計
無如王意已先偷

詐忠固位曉陰陽酷吏文深罪早彰吾惜沈寃三長史
案誅駢首爲張湯

任俠名流氣誼敦濟人初不市私恩季心劇孟今安在
緩急何從更叩門

濫將仁義許通侯竊國從知勝竊鉤何必兢兢重然諾
時流慣與世沈浮

貝帶鸚冠貌肅恭侍中佞幸荷恩濃特於傳尾標微旨
衛霍材能亦附庸

河伯何因歲娶妻革除敝俗惠羣黎六章故事庸流筆
強附西門入滑稽

賣卜長安味道腴成林蒿艾豈吾徒攝衣再拜升車返
俊辯心傾二大夫

龍門原帙久無聞大論知難補傳文莫詎叢亭滋駁議
須知危策異人羣

攘往熙來世盡同人人妄冀作朱公學儒猶道治生急
列傳端應貨殖終

百卅篇書錦繡羅襦生難免續貂訶摹天繪地談何易

六一追蹤未足多

正史規模此創端
裴駙集解軼猶完
更傳索隱單行本
正義全書惜已殘

養疴漫興

誰能與世俗同流
天遣羈孤類楚囚
塵事可憐歸一映
浮名何敢冀千秋
病甘睡癖偏宜嬾
老作書淫未肯休
著述縱教供覆瓿
人生難得是窮愁

孫存存殤

嗣子宜賓所生名信昭今年方上學識字歿於六月七日

阨我天心酷窮民
感倍滋纒經三日
病竟歿七齡兒
妄冀承家學虛言卜
大期傷懷惟一慟
此淚祖先知

病亟寄蔣厚軒訣別二首

自亡季子失知音更有賢兄氣誼深皎皎秋霄一輪月
分明生死兩人心

不更重留住世痕戀情厭意兩無存暫眠爭似長眠穩
從此浮生息夢魂

玉鑑堂詩集卷六

玉鑑堂詩集六卷同里汪謝城學博著學博名曰楨咸
豐壬子舉於鄉官會稽教諭左文襄撫浙時雅重其才
嘗欲延之幕中婉辭報謝於地方利弊則多所陳說焉
著南潯鎮志網羅遺籍至二千五百餘冊其精博直駕
潘爾夔方燾董肇鏜范來庚四志而上之尤善爲詩而
不暇自訂予得其叢稿爲編次之壽諸木集中備古近
各體不規規于唐宋門戶以標幟志蓋以宣德達情而
世之汙隆身之榮鬱實左右之其五律七絕出入輞川
玉溪閒有花放水流之趣至丁粵寇之難傷離念亂所
得益深則上窺工部與昌黎矣如廢宅賁兒報災苦旱
各篇何異石壕諸什漢鼎一詔亦昌黎之詠石鼓也餘

如初冬雜感九秋詩社動成三四十章清詞麗句絡繹
奔赴不必雕肝鑠胃而自歆合於古讀之使人意消其
於鄉曲一節之奇顯微闡幽尤足補史氏之闕晚爲校
官鬱鬱不自得且有齟齬之者觀卷六旁觀一律有云
甘蕉縱已彈章被苦筍何曾致仕差處已如棉真善耐
汙人猶膩恐難揩又縱筆一律有云螻蛄烏鳶誰予奪
鯢鵬蜩鷲自逍遙士師未必甘三黜刺史何曾守六條
皆有爲而發可以哀其遇矣辛酉小滿節吳興劉承幹
跋